

四庫全書

子部

欽定四庫全書

唐開元占經卷八

唐 瞿曇悉達 撰

日占四

日暈

石氏曰日傍有氣圓而周匝內赤外青名為暈 夏氏
曰日暈者運也 如淳曰暈日運也暈者屯也暈者圍
也一說暈者軍營衛氣也營衛君也 蔡伯喈曰氣見

於日傍四周為暈 方言曰日暈為躔躔歷行也 爾

雅曰彗日為蔽雲郭璞曰即暈氣五色覆日者也釋名
曰暈卷也氣在外卷結也 春秋感精符曰一失陽事

則日暈 石氏曰日暈者軍營之象周環匝日無厚薄

敵與軍勢齊等若無軍在外天子失御民多反叛 班

固天文志曰兩軍相當日暈等力均也 甘氏曰日月

皆暈共戰不合若兵罷 洛書曰日出而暈必有取主

不乃有師破 石氏曰日以庚子暈有赦令 河圖帝

覽嬉曰正月日暈兵春起不勝 河圖帝覽嬉曰日以

正月若五月中有九暈以上道上有熟死將一曰多死人 荊州占曰日有朝夕之暈是謂失地主人必敗

荊州占曰日三暈軍分為三 夏氏曰日暈圖云日暈潤黃濁黑搖為風雨且惡不動搖有憂病不則有暴惡 令太公陰祕曰日暈明分中赤外青外人勝中青外赤中人勝中黃外青黑中人勝外黃中青黑外人勝外白內青外人勝內白外青中人勝中黃外青外人勝中

青外黃內人勝 太公陰祕曰日暈黃白不鬪兵未解
青黑和解分地色黃土功動民不安色黑有水陰國盛
色白有喪色青為疾病色赤大旱流血千里 京氏曰
日暈有兵在外者主人不勝宜客 太公兵法曰日暈
始起前滅後匝而後成者後面勝 太公兵法曰日暈
周匝東北偏厚厚為福東軍在東北戰西南戰敗 孝
經內記曰日暈而明天下有兵兵罷無兵兵起不戰
洛書摘亡辟曰日暈明人主有陰伏之謀 京氏曰日

暈若井垣若車輪二國皆兵亡 石氏曰日有青暈不出旬有大風糴貴十倍人民多疾病凶 河圖帝覽嬉曰日暈中赤外青羣臣親外赤中青羣臣內其身外其心 石氏曰日有黑暈灾在用事臣 高宗日傍氣圖曰日暈蒼黑女主有憂 京氏曰日有黃暈一重人主有喜 洛書曰日有青圍之謂之青暈不出二旬大寒糴大貴外長三錢一歲五見糴五倍六見糴六倍不止不出一年民相食多疾疫在所見之國 禮斗威儀曰

君乘水而王其政昇平則日黃中而青暈 洛書曰日有黑暈之候不出六十日有大水傷五穀敗人室宅所見之國糴貴十倍三旬止一歲十見此者四海有役窮民不得守其鄉死不收藏 禮斗威儀曰君乘水而王其政昇平則日黃中而黑暈 孝經內記曰日有白暈之候一本日白暈不出九十日有大暴兵粟大貴三倍歲多暴風春雪霜民多病亡野犬多狂所見之國尤多其君不安 禮斗威儀曰君乘金而王其政象平則日

黃中而白暈

宋均曰象者取象于鏡見儀表端正

洛書曰日有赤圍之

候不出終食必有大雨雷霹靂殺乎為人民者天下不同獨以所見為然必有大暑道無行人圍候者日與辰星俱失度不出旬日圍候數如此者不便貴人一歲數有圍候歲十餘王者不安大臣坐事不出二年中天子亡細布貴後一年蠶不為縑絮四倍萬民大寒見此之戒禮斗威儀曰君秉火而王其政煩平則日黃中而赤暈孝經內記曰日有黃圍之候風雨農田治一歲

數見且大安所見之國吉不出三年 孝經內記曰日

暈亡日無雨大風起兵若土功各當其星占

凡日月傍有異氣抱

珥強帶虹蜺背璫纓紐格履之屬三日內有大風二日內有大雨灾解不占

甘氏曰日暈七

日無風雨兵大作不可起衆大敗不乃月蝕

日方暈連環暈

高宗日傍氣圖曰日方暈而上下聚二背將敗民散

又曰日暈方如井幹天下不和 荊州占曰日暈連如

環為兩軍兵起君爭地 高宗日傍氣圖曰日暈環而

聚君死

四邊亞出也

日暈而珥

京氏曰日暈而珥宮中多事后宮分爭七日不雨審察
中 甘氏曰日暈而珥主有謀軍在外外軍有侮 荆
州占曰日暈而珥天下有立侯王 荊州占曰日暈而
珥于暈上將軍易 甘氏曰日暈而珥如井幹者國亡
以亂有大兵反 又曰日暈而珥合在軍中一珥一國
二珥二國三珥三國同攻是國也 甘氏曰日暈而珥

聚在傍貴人有罷者 太公兵法曰日暈而珥主有謀
十日不雨兵起 石氏曰日暈而珥合國有謀反 日
暈圖曰日暈右珥者王侯有喜人君有私事在后宮
洛書曰兩敵相當日暈兩珥平等俱起而色同軍無相
奈何色厚潤者賀喜 又曰日暈兩珥君有喜一曰衆
在外有大事 石氏曰春暈有四珥人主更令

日暈而負

夏氏曰日負負者青赤如半暈狀以着暈上則為負負

者位也得地為喜 京氏曰日暈重有四負殃大國亂
若三日大雨不占 孝經內記圖曰日暈負且戴國有
喜戰從戴所擊者勝得地

日暈而冠戴珥抱背璫直提虹蜺雲氣

孝經內記曰日暈且冠戴又有反照于日上有戴赤青
長四五尺左右上下有氣各一丈許不出九十日有立
侯王不出百日有大赦糴貴十倍大豆尤甚 石氏曰
日暈且冠且戴天下有立侯王若自立者分必益土

石氏曰日暈且冠王者有拜謁若立諸侯德令四方天下大赦 孝經內記圖曰日暈有冠兩珥有纓貫珥中下交日下天下有名之臣死不出三十日有赦 太公兵法曰日暈冠三珥天子有喜或為大赦或拜大將軍 高宗曰日暈冠珥紐人主有喜慶且有所立不出年中 京氏曰日暈戴抱珥其色皆赤內青外清明即國家有吉賀喜 洛書曰日暈且戴而暈兩有氣皆如珥形中赤外青是謂珙璧一名霧成色皆黃白潤澤有獻

璧玉寶璫器者天子有喜所以然者日天子象也璧玉者陰之榮也黃白潤澤故言天子有喜 夏氏曰日暈而珥外有一抱所圍城者在外外人勝 孝經內記曰日暈暈中有珥一抱所謂圍城者在中中人勝 高宗日傍氣圖曰日暈珥兩抱天子且有慶一抱喜至氣黃白赤皆吉也 荊州占曰日暈而珥背左右如大車輪兵起其國亡城兵滿野而城復歸 京氏曰日暈有四珥各四背珥期六十日羣臣有異謀者有急事閉關不

行使天下更命三日雨不占四背白氣干之其端青赤
是妃與臣下共弑其君 夏氏曰有軍日暈有一抱抱
為順貫暈中在日西西軍大勝東軍大敗中赤外青若
在日東東軍大勝西軍大敗南北亦然 石氏曰日暈
有抱抱為順在日月之傍王者有喜子孫吉昌政令行
洛書曰凡占兩軍相當必謹審日月之暈氣知其所
起止遠近應與不應遲疾大小厚薄長短抱背為多少
有無實虛久亟密疎澤枯相應日等無相奈何故曰近

勝遠疾勝遲大勝小厚勝薄長勝短抱勝背多勝少有
勝無實勝虛久勝亟密勝疎澤勝枯重抱大勝無抱也
抱為和親抱多親者益多背為不和分離相去背于中
者離于中背于外者離于外也凡分離相去之相親疎
赤中外青以和相去青中外赤以惡相去 太公兵法
曰日暈抱珥喜氣日暈黃者主人有喜 太公陰秘曰
日一暈一抱一背為不和信者更逆不信者順 夏氏
曰日暈圖云暈有重抱後有偕戰順抱者勝得地 高

宗曰日暈兩抱天子有喜天下和平色赤黃白皆吉有和親 高宗日傍氣圖曰日暈四抱天子有喜將相治端皆向主者來和親 甘氏曰日暈抱珥上將軍易

京氏曰日暈背氣有暈中此為不和分離相去其色青外中赤忠臣受命主有所之兩軍相當中人軍欲降叛于外也 董仲舒曰日暈而背君臣俱危主失節 太公陰秘曰日暈有背大臣有叛者或曰左右欲有走石氏曰日暈而背兵起其分失城 石氏曰日暈有背

背為逆有降叛有反城在日東東有叛在日西西有叛

南北亦如之 高宗日傍氣圖曰日暈一背臣弑主

按中

興書曰隆安元年十二月壬辰日暈有背瑒是後帝不親萬幾會稽世子元顯專行威罰義熙六年五月丙子日暈有背瑒是時盧循逼京都戰于郊也 石氏曰有軍日暈有一背背為

逆在日西東軍大勝西軍大敗若在日東西軍大戰東

軍敗南北亦然 孝經內記圖曰日暈上下有兩背無

兵兵起有兵兵入 魏氏曰日暈四背在暈內名曰不

和有內亂離于中 夏氏日暈圖曰日暈暈中有兩背

兩璫又半暈臨日反臣起中不成 孝經內記圖曰日暈外四背璫所謂離于外者外臣有離去者 孝經內記曰日暈中有四背璫其背端盡出暈者反役內起 京氏曰日暈而背四如大車者四提設其國衆在外有反臣 高宗日傍氣圖曰日暈一背麗陣貫之大臣欲犯其主 孝經內記圖曰日暈有璫裂地立王 石氏曰日暈中有璫氣璫為不順與背同人臣不忠而外其心君臣乖離其國兵起若有逃臣 京氏曰日暈直氣

貫暈中白其色將失順其氣攻破軍 高宗曰日暈清

明一傍直有立侯王其色青外赤內潤澤者上所立也

石氏曰日暈有直氣在兩傍其國有自立者若立諸
侯一曰王者封賞左右 魏氏圖曰日暈有二直欲自

立者明者立若黑不明者死 魏氏圖曰日暈有一直

一背欲自立二直二背欲自立有三直三背欲自立有

四直四背皆欲自立也赤中青外不成 夏氏曰日暈

有直珥為破軍貫日中為殺將 高宗曰傍氣圖曰日

暈兩直一背有反臣 石氏曰日暈四提必有大將出

亡者 京氏曰日暈而且冠三重日下有虹行正長數

丈不出其年有反者貴人絕後有兵饑

按司馬彪續漢書曰光武建武

七年四月丙寅日而有暈虹貫暈在畢八度畢邊兵秋隗囂反侵安定

荊州占曰日暈

而珥赤虹貫直其國分者受其害 石氏曰日暈有抱

背珥直而有虹貫之者順虹擊之大勝得地 玄冥曰

日月暈背彗孛虹蜺在箕兵起後宮 玄冥曰日月暈

虹蜺彗孛在尾兵起於宮將交走期百八十日 石氏

曰日月無精光青赤暈蜺背璫在心度中是謂大盪兵
喪並起王者以赦降外 京氏曰凡日出虹暈主分地
日入虹暈諸侯分地黑者以兵分地白者以喪分地也
荊州占曰日暈而白虹奸而屬域之東東斥地域之
南南斥地域之西西斥地域之北北斥地四方皆紆而
四方斥地是謂人主驕溢期不出五年 夏氏曰日暈
二白虹貫暈有客戰勝 孝經內記曰日暈有虹貫暈
中順虹擊者勝殺將 甘氏曰日暈而珥有雲穿之者

天下名士死

高宗日傍氣圖曰日暈兩珥而下有黃

雲人主有喜期百二十日遠年中

甘氏曰日暈而兩

珥在外有聚雲在中與外不出三日城圍出戰 春秋

感精符曰日一暈兩珥有立雲貫日出國多妖孽 洛

書摘亡辟曰日暈而兩珥立雲貫之國有大疾 春秋

緯曰日暈有兩珥黃雲貫之不出三月貴人有死者

黃帝兵法曰日月暈仰視之須臾忽有雲氣從傍入者

急隨雲以攻之大勝 太公陰秘曰日暈有五色雲如

杵貫日從外入外人歸勝從內出內人勝欲知姓字白
者商赤者徵青者角黑者羽黃者宮 太公陰祕曰日暈
有衆雲在左右色黃白吉青白兵行黑白內亂青赤和
解青黑流血俱明者未解兵不歸明者勝 甘氏曰日
暈有聚雲不去者兵起 甘氏曰日暈有聚雲外入不
出三日國城圍 夏氏曰日暈有雲氣從暈外入者兵
得入雲氣從中出者兵從中出 孝經內記曰日暈有
青雲三從外貫暈戰客勝 夏氏曰貫日以日宿占之

夏氏曰日暈有青氣從中四出有圍城城中勝有直交三有欲自立不成 夏氏日暈圖曰日暈有青雲從外四貫暈有圍城外勝中 高宗日傍氣圖曰日暈下有青雲如死虹屬暈大將死亡 五音候曰日暈合氣如人在暈中偕日者臣叛不脫日暈不合叛者得脫

孝經內記圖曰日有白氣從外向內刺外人勝圍城城拔 孝經內記圖曰日暈有白氣從內向外刺中人勝圍城城不拔 石氏曰日暈有白雲如車蓋臨上城降

得地 高宗曰日暈有赤氣如戟臨之其國兵起 高

宗曰傍氣圖曰日暈傍有赤氣如節如旗狀在外名曰

蚩尤之旗兵從內起 孝經內記圖曰日暈赤氣貫中

屬日臣賊主赤甚者為用兵不甚者為用藥陰者不發

人莫知之 高宗曰傍氣圖曰日暈有黃氣承之得地

不出年中 夏氏日暈圖曰日暈有虹貫暈不中日戰

從貫所擊之勝得小將 夏氏日暈圖曰日暈有白虹

貫從虹所擊戰勝破軍殺將 魏氏圖曰日暈有白虹

七貫暈以圍城主人勝城不拔 孝經內記曰日暈有

氣如牛入居暈不出三日寇入城 京氏曰日暈不合

有雲如牛在暈外來入暈中臣不服 京氏曰日暈有

氣如毛羽臨日不去國有大兵憂 高宗曰日暈有四

銳氣如峯四出國君亡 高宗曰日暈有錦文氣潤色

從外入者有文書喜至從中出者王使出喜事也枯乾

不明者舉事憂 王朔曰日暈有錦文之氣在暈中君

欲遣使文書大行日暈有錦文之氣在暈外外文書來

五音候曰日暈氣如人在暈中向日中人受令在暈
外向日外人受令一曰使臣還得其正色有喜不得王
氣有憂 五音候曰日暈氣如卧人在暈上其下破敗
五音候曰卧人氣在暈中君有憂臣暴死 又曰日
暈卧人氣在暈外臣有憂憂主死

日重暈

魏氏曰日重暈中赤外青有臣謀邪不成 夏氏曰日
重暈攻城圍邑不拔重暈天下有立侯王不乃拔城

京氏曰日重暈有德之君得天下 石氏曰日暈再重

其分戰有功 河圖帝覽嬉曰日暈二重其外青中濁

不散 孝經內記曰日有青暈二重者其灾在春內女

親用事甲乙暈者所見之國彫殺草木五穀不出六十

日中有兵起所見之處者用事弱亂故日暈青三年乃

止 石氏曰日有青暈再重主后親戚在內為亂王者

有憂

案洪範五行傳曰周幽之敗也日暈再重中暈赤外暈青一黑盡上下通在日中是歲有幽王之敗

孝經內記曰日有黑暈二重其灾在冬月



唐開元占經卷八

欽定四庫全書

子部

唐開元占經卷九

詳校官中書_臣李采

靈臺郎_臣倪廷梅覆勘

總校官編修_臣王燕緒

校對官庶吉士_臣潘魯起

謄錄監生_臣任鑑

欽定四庫全書

唐開元占經卷九

唐瞿曇悉達撰

日占五

候日蝕一

京房日蝕占曰日之將蝕也五龍先見於日傍青龍見於日左以春蝕赤龍見於日上以夏蝕黃龍見於日中央以六月蝕白龍見於日右以秋蝕黑龍見於日下以冬蝕欲

候此龍見日蝕法當以五寅日候之春以甲寅夏以丙寅
六月下旬以戊寅秋以庚寅冬以壬寅此所謂五寅也置
盆水庭中平旦至暮視之則龍見欲知何月孟月以孟仲
月以仲季月以季欲知何日蝕龍以上旬見日以朔蝕龍以
下旬見日以晦蝕龍以日出見以日出蝕龍以日中見以
日中蝕龍以晡時見日以晡時蝕龍以日入見日以日入
蝕春秋合誠圖曰日之將蝕陽微陰漸其城君蔽臣
恣下壅塞九引先出日乃毀息

陽日也君也陰月也漸猶入也君微弱故陰氣

入日是主間蔽臣下壅塞君恩化使不施行也九引常
先出卒蝕日也日將蝕破滅必先氣引出見祥也

經以效類垂萌法至尊陽精魄

常經垂萌上十二月所祭者也故冬至夏至入

陽氣陰注布貞以精明魄推成其尊也

春秋感精符曰日將蝕必先青黃

不卒至漸消也日光沉掩皆月所掩毀傷雖為政伐其

雄京氏曰日失魄者將蝕月失魄者水所謂失者日

光精移處若有兩日也尚書璇璣鈴曰北斗第一星

率色數赤不明七日内日蝕春秋感精符曰日紫色

出二十日以上則蝕既禍必合石氏曰日月以二月

八月出房南過其度其衝日月以晦蝕出房北過其度其衝日月以朔蝕 郝萌曰辰星受制不見與鬼乃日蝕 郝萌曰歲星辰星逆乘張左右角皆為日蝕國有大變 荊州占曰諸日變皆旬望以上旬十日望十五日其衝月皆應當蝕乃災成正月日色變來七月日蝕是也 韓楊曰熒惑南去列星間從四舍以上期百二十日日蝕

候日夜蝕二

易萌氣樞曰日夜蝕者火中無影言日當夜蝕建八尺
竹視其下無影蝕不可見故以表候之耳日所以夜蝕者
人君諱其過臣下強君不能制見臣之惡反以為善見
臣邪僻反以為正直故日夜蝕陰過盛陽道微日夜蝕
者謀臣誅

日薄蝕三

河圖帝覽嬉曰日月赤黃無光命曰薄破毀傷命曰蝕
孟康子曰日月無光曰薄京房易傳曰日月不交

而蝕曰薄 韋昭曰月氣往迫之為薄 京房易傳曰蝕皆於晦朔有不於晦朔者名曰薄此人君誅不以理賊臣漸舉兵而起雖非日月同宿時陰氣盛猶掩薄日

光也

釋名曰日月虧日蝕稍侵虧如蟲食草木也

按

承後漢書曰江夏黃琬七歲祖瓊為魏郡太守梁太后詔問其日蝕之狀未能對琬跪而曰何不言日蝕之餘

如月之初

穀梁傳曰日有蝕之吐者外壤蝕者內壤闕然

不見其壤有食之者也

毛詩曰彼月而食則惟其常此

日而食于何不臧

春秋考異郵曰麟龍聞則日月蝕

按淮南鴻烈曰麒麟闢日月蝕也

五經通義曰日蝕者月往蔽之君

臣反不以道故蝕

春秋漢含孳曰臣子謀日乃蝕

案檀

道驚晉陽秋曰考武太元元年十月辛亥日有蝕之時有張五虎路六根等謀反諸葛侃誘斬之滅其凶黨

春秋運斗樞曰人主自恣不循古逆天暴物禍起則

日蝕 禮斗威儀曰君喜怒無常輕殺不辜戮無罪慢

天地忽鬼神則日蝕 淮南子曰君失其行日薄蝕無

光 京房易說曰下侵上則日蝕 河圖帝覽嬉曰日

蝕所宿國主疾貴人死用兵者從蝕之面攻城取地

河圖曰日三蝕三雄謀日四蝕四夷謀 春秋感精符
曰再失陽事則日蝕謫見 春秋感精符曰日蝕有三
法一曰妃黨恣邪臣在側日黃無澤則日以晦蝕其發
必於眩惑二曰偏任權并大臣擅法則日青黑以二日
蝕其發必於酷毒三曰宗黨犯命威權害國則日赤鬱
快無光色則日以朔蝕其發必於嫌隙 班固天文志
曰古人有言曰天下太平五星循度無有逆行者日不
蝕朔月不蝕望 洪範傳曰日蝕必以朔非朔為薄蝕

陰盛侵陽其君凶不出三年日蝕皆蝕合朔不當蝕晦蝕晦者陽行遲陰行疾君舒臣驕之異也 京房易傳

曰人君謀罰不理臣下將起則日蝕不以朔晦 春秋

感精符曰日之蝕國絕也 春秋緯曰君不聰聽無知

德威令不嚴舒懦為臣下所侵則日光青赤其後久旱

地動搖宮陰氣盛下臣太恣橫陽精挑奪日行失度不

得則日月薄于晦陽為臣所悅故以晦日蝕之失後也

案洪範天文日月度占曰春秋魯昭公二十四年夏五月乙未朔日有蝕之周之五月建辰今之三月也魯趙

分也魯太師梓慎曰將水叔孫昭子曰旱也夫日過春分而陽猶不勝陰能無旱乎是秋魯大旱凡二至二分日有蝕之不為水災大旱而已也

易萌氣樞曰昭明蔽塞政在臣下

親戚干朝君不覺悟即雜氣失以星奔日蝕為咎

案洪範五

行傳曰漢成帝建始三年冬十二月戊申朔日有食之其夜未央殿地震日在須女九度占在皇后貴妾其後皇后廢趙飛燕姊妹亂

宮皇子死王氏專權

易通卦驗曰日蝕則害命王

道傾側故日蝕則正人主之過詩推度災曰日蝕君傷

按檀道鸞晉陽秋曰孝武大元二十年三月庚辰日有食之二十一年九月庚申帝崩

詩含神

霧曰日之蝕帝消

案袁宏漢紀曰安帝永初五年正月庚辰朔日有蝕之本志以為正旦王

者聽朝之日也鄧太后攝政天子守虛位不得行其號
令蓋陽不克之象也晉中興書曰成帝咸和六年三

月壬戌朔日有食之是時顯宗已長幸司徒第猶出入
見王導夫人曹氏如子弟之禮以人君而敬人臣之妻
有虧君德九年十月乙未朔日有食之是時
顯宗冠當親萬幾而委政大臣君道有虧也春秋潛

潭巴曰凡日蝕之敗或地嘔血或天雨蝗鳥旁蜚龍羣

鬪長人入宮虎哭雉巢列宿滅皆禍敗顯然之徵也

春秋潛潭巴曰日蝕之後必有亡國弑君奔走乖離相

誅專政擁王滅兵車天下昏亂邦多郵

按洪範天文志日月變占曰春

秋魯昭公十五年夏六月丁巳朔日有食之晉魯分也
後二年晉昭公九年六卿專晉三家擅魯魯昭公奔之

應也 洪範五行傳曰漢高帝三年冬十一月癸卯晦日有食之吳齊分也後二年齊韓信徙封楚王三年廢為侯而誅之應也 晉中興書曰太和三年三月丁巳日有食之五年七月癸酉日有食之皆海西被廢之應也 宋書天文志曰晉元帝太興元年四月丁丑朔日有食之明帝太寧三年十一月癸巳朔日有蝕之在斗斗吳分也其後蘇峻作逆 安帝元興二年四月癸巳朔日有食之其冬桓玄篡位

春秋合誠

圖曰日蝕之主見賊 春秋保乾圖曰日蝕主行蔽明

壅塞改身修政乃黜不法又曰日蝕治亂 春秋公羊

傳曰日蝕皆臣弑君子弑父夷狄侵中國之異

按洪範天文志

日月變占曰春秋魯莊公十八年春三月日有食之衛齊分也後狄人滅衛齊桓公救而封之應也二十六年

冬十二月癸亥朔日有食之燕分也其後山戎侵燕齊桓救燕北至孤竹平山戎之應也三十年九月庚午朔日有食之楚之分也其後楚世子商臣殺其君父之應也魯文公元年春二月癸亥朔日有食之齊分也後十一年間狄三侵齊十四年昭公卒其弟公子商人殺其君兄子而自立四年齊人殺之大亂之應十五年六月辛丑朔日有食之晉分也此正陽純乾之月陰氣未起而能侵陽其災最重明年晉趙穿殺其君靈公而周匡王崩之應也魯襄公二十一年秋九月庚戌朔日有食之楚分也後十二年楚公子圍殺其君兄而自立之應也韋昭漢紀曰光武十七年二月日有食之二十年五月朔虜數犯上黨銅鞮右扶風二十一年匈奴大入上谷郡之應是也

洛書曰日蝕復生者日光復故也從日蝕生地擊敵破之
荊州占曰日蝕之下有破國大戰將

軍死有賊兵

按洪範天文日月變占曰魯成公十六年六月丙寅朔日有食之晉分也是月魯侯

伐鄭戰于鄢陵楚師大敗恭王傷目將軍子反死之晉侯時豫而驕多殺大臣明年晉大夫欒書中行偃遂殺

厲公大亂

之應也

洛書曰日蝕不祥善惡各為其國

按左氏傳日昭

公七年夏四月甲辰朔日有食之晉侯問于士文伯曰誰將當日食對曰魯衛惡之衛大魯小公曰何故對曰去衛地如魯地杜注曰衛地豕辛也魯地降婁也日食自於豕辛之未及降婁之始乃息故禍在衛大在魯小也傳曰于是有灾魯實受之其大咎其衛君子魯將工卿注曰八月衛侯卒十一月季孫宿卒又洪範天文日月

變占曰魯僖公五年秋九月戊申朔日有食之楚周之分也其後楚莊王觀兵于周疆有問鼎之應洪範五行傳曰洪高帝三年冬十月甲戌晦日有食之燕吳越分也後二年燕王臧荼反誅腹以盧綰為燕王亦反誅南

越王趙佗自立
稱帝之應也

洛書曰日月蝕當用兵擊之君安日

月蝕不可出軍日蝕之歲不可出軍月蝕之月不可出
軍 甘氏曰無道之國日月過之薄蝕兵之所攻國家
亡又以有喪 甘氏曰日陽精之明耀魄寶其氣布德
而至生本在地曰德德者生之類也德傷則亡故日蝕
必有國災日蝕則失德之國亡日蝕修德 甘氏曰日
薄色赤黃其月旱 京房妖占曰日蝕無道之君當之
京氏曰外交之蝕蝕旦不虧虧而地猶明是外謀也

京氏曰專政之蝕日明缺至陽雖侵光猶明是司馬舉

兵欲起 京氏曰日蝕諸侯相侵白青明君弱 京氏

曰日蝕國有兵大戰從西方來勝 京氏曰日蝕王為

君蝕相為臣蝕因為罪人蝕死為夷狄蝕休為民有兵

其兵從陰所來日蝕後必通水在陰所來在於三年之

內又必有火燒屋

按韋昭洞紀曰漢和帝永元二年二月三日食三年左校尉耿种等征匈奴

戰破之安帝元初三年日蝕京師旱武陵蠻夷燒官寺

桓帝永康元年日食渤海水溢殺人十二月丁丑帝崩

孫盛晉陽秋曰武帝太康七年正月甲寅朔日有食之

乙卯又食詔曰邦之不臧實在朕躬公卿大臣極言其

失太尉亮司徒舒司空璿上言曰三朔之始日有食之
蓋陽節過而堅冰未消謹按經義曰君道也父道也夫
道也君子道也陽勝陰陽氣之常今冰不消陰氣盛陰
盛者臣擅主權也孝道不修也後宮過度小人在位也
后八年正月戊申朔日又食
太熙元年而武帝崩之應也

劉向洪範傳曰日之為

異莫重於蝕故春秋日蝕則書之也日蝕者下凌上臣
侵君之象也日蝕數者其亂衆稀者亂亦稀 洪範傳

曰人君失序享國不明臣下務亂羣陰蔽陽則日月薄
蝕汶闇暗昧若蝕從中起背璫縱橫則亂交爭兵革並
行 史記天官書曰諸侯作亂日蝕盡時 夏氏曰日

蝕出軍軍折傷後疾病 荊州占曰日蝕當其國君王

死

按韋昭洞紀曰周平王五十一年日食三月平王崩洪範天文志日月變占曰高帝九年六月乙未晦

日有食之周泰分也是時漢都長安都東及洛陽為畿內明年四月高帝崩 韋昭洞紀曰漢文帝二年十

一月晦日食帝引咎責躬舉直言省徭費闢籍田除誹

謗妖言之罪文帝後四年四月晦日食七年六月己亥

帝崩哀帝元壽元年正月辛丑朔日有食之不盡如鉤

明年哀帝崩 晉中興書曰愍帝建興五年十一月先

晦二日丙子日有食之十二月愍皇帝崩于虜庭咸康

八年正月乙未朔日有食之京都大雨郡國以聞是謂

三朝王者惡之六月而顯宗崩升平四年八月辛丑朔

日有食之幾既在角為大門人主惡之明年孝宗崩也

洛書曰日蝕從所蝕利擊敵也 王朔曰日蝕兩敵

相當即從蝕所擊之大勝殺將

日蝕早晚所主四

甘氏曰日出至早食時蝕為齊食時至曷中食為楚曷
中至日中蝕為周日中至日昃蝕為秦日昃至日晡蝕
為魏晡時至日夕蝕為燕日夕至日入蝕為代皆為不
出三年當之者國有喪 甘氏曰日始出而蝕是謂無
明齊越受兵一日亡地 京氏曰日始出而蝕是謂棄
光齊楚亡 甘氏曰日中而蝕荆魏受兵一日亡地海

兵大起 太公兵法曰日中蝕海內兵大起王公憂
石氏曰日晡蝕兵將罷兵不起 甘氏曰日將入而蝕
大人出兵趙燕當之近期三月遠期三年 魏氏圖曰
日入而蝕是謂勝明大人出兵起當之

日蝕從上起五

春秋感精符曰日以上蝕者子為害 甘氏曰凡日蝕
則有兵日蝕從上失於道君當之 京氏曰日蝕上者
君為其偽佞人而安用之故尊卑失禮責於尊者故天

見亡君之象 京房易傳曰凡日蝕從上失臣 郝萌
曰日蝕上皆為責在君其色青則弱於任善生怨患赤
則君無禮不好學黃則君欺其下掩臣美白則弱於誅
惡生仇讎黑則簡宗廟鬼神

日蝕從中起六

甘氏曰日蝕從中央起內亂兵大起更立太子 京氏
曰日蝕內者君即朝臨政厲心為治不疑臣下臣下以
邪亂君政故天見亡臣之象故臣當之 京氏曰日蝕

從中中青赤外黃國亡又曰中人為亂 郝萌曰日蝕
中皆為內有伏謀青則謀者止赤則謀其事黃則謀成
者受誅白則事覺黑則逆謀成其事 洪範曰日蝕貫
日中央上下竟而黑臣弑君從中成之刑也 荊州占
曰凡日蝕從中者人君有娶於同姓 荊州占曰日蝕
從中央始國君遇賊 荊州占曰日蝕從中起君受兵
一曰所宿國有兵一曰臣謀君 荊州占曰日蝕中央
空主死期三年應以善事則消災

日蝕從下起七

甘氏曰日蝕從下者王室女淫自恣此臣下當有動師
衆行軍又曰失於事將當之 春秋感精符曰日蝕從
下起妻害急 京氏曰日蝕從下起失民人君疑於賢
者為不肖不用其政教故天見亡民之象也以人君尊
天將亡君必先喪其民蝕者侵削之意也 京氏曰日
蝕從下起多死一曰下人為寇 郝萌曰日蝕下皆為
責在民責則民相譖後有疾疫蟲灾赤則衆庶上僭强

乘弱後有旱灾黃則失民飭宮室爭土疆後有土功皆奪主光減年筭白則民相賊害後有小兵黑則小民多怨後有水災期三年也

日蝕後左右起周蝕四傍八

京氏曰日蝕光清無雲三日乃蝕蝕已天鳴蝕左右此臣與君爭美尸大功日君也所以有功者我也心生慕意起之蝕也後九年臣謀君六年成京氏曰日蝕左為噬嗑火燒民京氏曰日蝕從傍起者為兵從其方起

黎庶為亂 郝萌曰日蝕左皆為責在臣青則臣專恩
赤則臣無禮於君黃則臣侵君上白則臣專法黑則欺
君失臣 京氏曰日蝕從右傍者君親作惑道虎狼之
行 京氏曰日蝕右皆為責火燒諸侯必有異災起
郝萌曰日蝕右皆為責在臣青則佐公作惡赤則佐公
作福黃則放其君白則佐公作刑黑則臣作威 天鏡
曰日蝕從右傍者淫女暴為主君當暴治丘塚傷害人
民百姓怨 甘氏曰日蝕從傍起失於令相當之 河

圖曰日青黑以傍蝕之臣之害

按洪範日月變占曰漢武元狩元年五月乙巳

晦日有蝕之從傍左明年丞相公孫弘薨之應

春秋感精符曰日蝕傍者臣

欲作禍之應殺君亡國四夷入侵遠期二十七年中期

二十九月近期九月 郝萌曰日月蝕皆為責在妃青

則女疾衆妾欺君奪主榮恣害爭寵內患赤則右夫人

乘君損主白則衆妾怨妬黑則君內消將絕嗣卑妾得

志滅君德失夫人 荊州占曰日蝕四傍缺諸侯王有

死者期在三年中

日蝕中分日蝕不盡日蝕三毀三復九

京房易傳曰諸侯越職征伐與上分威則日蝕中分

荊州占曰日蝕中分五年其國亡一曰二年亡 荊州

占曰日蝕有亡其國者少半蝕少半亡半蝕半亡 甘

氏曰日蝕過半必有亡國期一年 甘氏曰日蝕不盡

有失地一曰強國有逐相 京氏曰日蝕不盡相有出

走者期八十日 董仲舒曰諸侯不承天子命自相侵

伐則日蝕三毀三復

此仲舒日
異對也

日蝕既十

河圖曰日蝕盡者王位也不盡者大臣位也近期三月
遠期三年 春秋感精符曰日蝕既則破陰謀黜豪傑
備邊輔王易號失天下外填寇內填下 春秋感精符
曰君行無常公輔不德夷狄侵萬事錯則日蝕既
孝經內記曰日朔蝕既天絕晦蝕既地絕先晦蝕既人
絕 石氏曰日蝕盡其國大人亡不盡相去 京房易
傳曰亡師茲謂不禦厥異日蝕其蝕既也 京房易傳

曰君臣不通茲謂亡厥蝕三既 京房易傳曰弑君
獲位茲謂逆厥蝕既先風雨折木日赤 京氏曰日
蝕地折 董仲舒曰前事已大後事將至者又大則
日蝕既 董仲舒災異對曰人君自專祿不封賜功
臣則日蝕既而黑光反外照 董仲舒災異對曰亂
臣賊子欲作逆弑君竊位則日蝕既先風折樹 董
仲舒災異對曰人君妬賢嫉能臣下謀上則日蝕既
先雨雹殺走獸 洛書曰日蝕盡伐者謂既也伐者人

君死子代之或臣篡殺不盡者日虧缺也

按洪範天文日月變

占曰春秋魯襄公二十四年七月甲子朔日有食之既既盡也秦晉分也後十二月秦景公卒其弟車自晉復于秦之應也漢惠帝七年夏五月丁卯先晦一日日有食之既既盡也亦周秦分野陰匿始起而犯盛其年八月惠帝崩呂后七年春正月己丑晦日有食之既既盡也在營室九度為宮室中呂后曰此為我也明年呂后崩應也

甘氏曰日蝕盡天下大凶有亡國一曰

必更王人主死近期二年不盡有失地者京房

易傳曰君誅殺失理臣下有叛心則日蝕盡而光

散又曰君臣見災不改行國將亡則日蝕三盡也

京房妖占曰日蝕盡臣欲殺主一曰歲有夷王起一

曰有喪

按韋昭洞紀曰周桓王十一年七月日食既十三年壬辰陳桓公鮑卒弟佗殺兄子代立也

京房災異對曰日蝕盡無光露者亡其邑 京氏曰日

蝕盡日官不見直日者其國有喪 荊州占曰日蝕盡

光此謂帝之殃三年之間有國必亡

日蝕變色十一

京房易傳曰凡日蝕其質赤黃黑而漸之者明臣侵君也日質赤黃而黑貫其中者此人君無威勢不行為臣

下所輕故臣謀欲逐其君居其劇也黃尚有中和之色也故其咎也必覺謀不行君誅臣當誅而不誅則君必失其位 京氏易傳曰日蝕赤質而黑漸之者此人君誅衆失理民持兵去之其咎欲殺 京氏易傳曰日蝕赤質青黑漸之者為三公誅衆失理民亦持兵去順受命征無道 闕

黑而貫其中臣欲殺其君不改期在九年必殺矣 京房易傳曰臣有伏兵將欲殺其君者日變白咎十日而去則日蝕矣白青者弱赤者

無知也強臣所緣上下必由此矣黃赤者非臣所緣為也京氏曰日蝕日光明先青赤白黑而蝕蝕黑貫白中日明此聖德之臣行兵誅伐小人左右不義之臣擅誅小人天子所謂無命而征與弑君同之蝕也後五年殺京房易傳曰酒無節茲謂荒厥蝕乍青乍黑乍赤乍白京氏曰日青並蝕惟命是爭誅京氏曰日赤並蝕自殺京氏曰日黃並蝕其下得土京氏曰日黑並蝕自殺易傳曰諸侯逆叛更立法度則蝕失光

晻晻月形見也

日蝕而珥有雲衝之十二

京房妖占曰以甲乙有二珥而蝕東西南北有白雲衝之天下有兵 京氏曰日以甲乙有四珥而蝕有白雲衝出四角青雲交貫中央天下有兵 京氏妖占曰日以丙丁二珥而蝕有黑雲衝出東南西北天下有兵 京氏妖占曰日以丙丁有四珥而蝕下有黑雲衝出天下有大水 京房妖占曰日以戊己有二珥而蝕上有

青雲衝出東南西北人主有喪 京房妖占曰日以戌
已有四珥而蝕有青雲衝天下兵行 京房妖占曰日
以庚辛二珥而蝕從下始又有赤雲衝出東南西北三
邑兵作 京氏易占曰日以庚辛有四珥而蝕從上始
有赤雲出西方天下有亂王 京氏妖占曰日以壬癸
有二珥而蝕有黃雲衝出邑有土功事 京房妖占曰
日以壬癸有四珥而蝕有黃雲衝出天子亡 京氏曰
日四珥蝕從上而下天子起兵從下而上天子有大喪

京氏曰日以春二珥而蝕從下始大半邑有死主

京房妖占曰日以春三珥而蝕從上始大半天下邑
有小兵重以喪 京氏妖占曰日以春四珥而蝕從下
始大半天下凶

日蝕而暈珥彗虹蜺十三

河圖曰日蝕而交暈貫日中兩軍爭後者勝將死之

荊州占曰日蝕其所從為側日蝕從中起而暈其分必
亡國 京氏妖占曰日以春暈三珥而蝕從上始天下

有兵 京氏妖占曰日以春暈四珥而蝕從下始天下
有大喪 洛書曰日蝕下有氣如彗星諸侯失國天子
有憂不改不出十二年 甘氏曰日蝕有如虹在日上
者比近臣謀上政不明不能見不出五年 京氏曰日
蝕轉為五色而蝕白虹見日傍光揜揜此嫡讓庶之蝕
也後三年尊坐無處

日蝕而有雲氣在日傍十四

京氏曰日蝕有雲如坐人於上者主安居下臣安 洛

書曰日蝕有黃雲中有伏龍周室以興文王受命洛
書曰日蝕而傍有白虎守之大臣謀死其君主不出三
月一曰三年石氏曰日蝕如白虎守日者人君九族
有伏謀亂君政以自成不救不出五年當有謀臣甘
氏曰日蝕有如白兔守日者民當謀舉兵威亂三州其
先見變不改不出其年兵行京氏曰日蝕有如兔守
日政令不由君或君不用賢澤不下施則高岸為谷深
谷為陵發於衝石氏曰日蝕有兔守之民為亂臣逆

君不出其年分兵起 甘氏曰日蝕有如羣鳥太公兵法曰兩鳥夾日名為天雞守日人君妻家謀奪君處先數視君動靜欲行其志天先見變戒之 天鏡曰日蝕有鳥夾之君當司謀防之急

日蝕而地鳴震裂十五

京房易傳曰內臣外向茲謂背厥蝕蝕已已且而地中鳴 京氏曰日蝕盛中時黑乃蝕之從內 闕

地中鳴此京師諸侯叛羣下與外土諸侯交亂法度

之蝕後人君亡國臣伏其殃 京氏曰日蝕先地中鳴
乃蝕蝕左右居雲中四方無雲先大風三日此宰相專
公謀反之蝕也後三年邪人謀反 京房易傳曰臣欲
居主位茲謂不和厥蝕白青四方赤已蝕地震 京房
易傳曰人君荒酒無節則日蝕乍青乍黑乍赤明日大
雨發濛而寒地震動宮中有水 京氏曰日蝕後霧霧
不解地必震不過旬中 京氏曰諸侯更制茲謂叛厥
蝕三蝕三復已而風地動 京氏曰專制之蝕光散左

右冠三蝕三復已而風明日地必動是謂諸侯專制之
變也後九年殺京氏曰日蝕地震一曰震裂日白若
中分日闕然見而寒乃蝕左右發四正此方伯征
誅過職威權上侵之蝕二年殺

日蝕而寒風雨雹雷十六

京房易傳曰同姓上侵茲謂誣君厥蝕四方有雲中央
無雲其日大風京氏曰親伐之蝕日體而寒時明是
不和自舉兵京氏曰日蝕其質黃者陽覺悟也寒後

九十日必有誅者 京氏曰日食已而寒飢陰疾多喪

京氏曰日大寒飢病非一處蝕陽下平旦蝕發于闕

對蝕從外後中國大飢盜賊羣居夷狄動心後九年

諸侯亂

闕

京氏曰日蝕白氣先出半天乃蝕五色

至大寒黑貫日有旋風

闕

京氏曰日食先焱風三日乃食蝕左右四方並有雲

濁中央無雲其日大寒發於風此同姓諸侯侵蝕也後

九年殺 京氏易傳曰宰相大臣因專權日蝕先大風

日食時日居雲中四方無雲也 闕

京氏曰

日食焱風雨七日折木乃蝕既此臣剥其君之蝕也五年五穀化為蟲 京氏曰日蝕為亂為兵已蝕而風是謂兵起已蝕而雨是為分殃已蝕而霧羣豪聚已蝕而飛鳥不復其鄉 京氏曰君疾善下謀下茲謂亂厥蝕

既先雨電殺走獸赤質黃貫其中此君不肯用賢而任小人政教君必逐 京氏曰縱欲茲謂不明厥蝕先大

雨三日雨降而寒既蝕 京氏曰日蝕而雷國亡

日蝕而星墜蝕盡晦而星見十七

京氏曰日蝕星墜復上此賦歛重數下竭之蝕九年殺

闕

京房易傳

曰人君貪殘重賦日蝕而星墜前而下也 韋昭洞紀

曰周闕王闕

年日蝕盡晦闕

年星又晝見闕

年周貞定王崩哀王時為太子立三月為弟叔殺之叔自立為思王五月後為少弟嵬復弑之嵬立是為

考王

日與月俱蝕十八

洛書曰日月俱蝕有亡國月先即陰國當之日先即陽國當之蝕陽男主受之蝕陰女主受之 魏氏曰日月俱蝕國亡一月三蝕主亡

唐開元占經卷九

欽定四庫全書

唐開元占經卷十

唐 瞿曇悉達 撰

日占六

日四時蝕一

春秋左氏傳曰魯昭公二十一年秋七月壬午朔日有蝕之公問梓慎曰是何物也禍福何為對曰二至二分日有蝕之不為灾日月之行也分同道也至相過也其

他月則為災陽不克也故常為水 甘氏曰日者
人主之象故王者服道不道施德不德日為之變見
道不明德薄日為之無光無德日乃盡蝕 春蝕大凶
又曰國有女喪夏蝕無年又曰諸侯王多死者秋蝕有
兵戰勝又曰主死冬蝕有喪一曰相死 甘氏曰春丙
丁夏庚辛秋壬癸冬甲乙日蝕者皆相死諸蝕三日有
雨解之 甘氏曰春以庚辛夏壬癸秋丙丁冬戊己日
蝕皆臣弑君也一曰以德令除咎 京氏曰日冬蝕相

死不即有逐 荊州占曰日夏蝕陽為南國陰為北國
是為禍國

日十二月蝕二

京房易傳曰正月日蝕大臣出走不然大臣一人死

石氏曰正月日蝕不見光人多疾 陳卓曰正月日蝕

齊大凶五穀貴 京房易傳曰二月日蝕人主夫人死

不然大旱 石氏曰二月日蝕不見光人多喪 陳卓

曰二月日蝕魯大凶豆貴牛死 京房易傳曰三月日

蝕有欲反者近期三月遠期三年 石氏曰三月日蝕
不見光水大出 陳卓曰三月日蝕楚大凶絲綿布帛
貴 京氏易傳曰四月日蝕人主有過臣有憂 石氏
曰四月日蝕不見光天下大旱 陳卓曰四月日蝕宋
大凶牛食貴六畜死 京氏易傳曰五月日蝕諸侯多
死期三年 石氏曰五月日蝕不見光大旱民飢 陳
卓曰五月日蝕梁大凶牛死畜貴 京房易傳曰六月
日蝕人主有謀外國侵土地分 石氏曰六月日蝕不見

光六畜貴 陳卓曰六月日蝕沛大凶稻米穀粟貴

京房易傳曰七月日蝕有反者從內起期三年 石氏

曰七月日蝕不見光其歲惡又曰秦國惡之 陳卓曰

七月日蝕陳大凶繒大貴 京房易傳曰八月日蝕大

水敗城郭天下更始期三年 石氏曰八月日蝕不見

光兵大起 陳卓曰八月日蝕鄭大凶兵起兵革金貴

京氏易傳曰九月日蝕外主欲自立不成期一年

石氏曰九月日蝕不見光布帛貴又曰衛國大惡 陳

卓曰九月日蝕韓大凶衣鹽貴 京氏易傳曰十月日

蝕奸臣在朝二人親一人遠陵君君走 石氏曰十月

日蝕不見光六畜貴又曰魏國魚鹽貴 陳卓曰十月

日蝕秦大凶魚鹽貴 京房易傳曰十一月日蝕王者

亡地子弑父 石氏曰十一月日蝕不見光魚鹽貴又

曰趙國大惡 陳卓曰十一月日蝕燕大凶魚鹽貴

京氏易傳曰十二月日蝕天下有兵大臣欲自立不成

夫人弑君也 石氏曰十二月日蝕不見光穀粟貴又

曰燕國牛死 陳卓曰十二月日蝕趙大凶帛貴 京
房易傳曰日以十二月正月蝕破為兩以上王者盡
走

日六甲蝕三

甘氏曰甲乙日蝕東夷侵丙丁日蝕南夷侵 春秋潛
潭巴曰甲子日蝕有兵狄強起 京氏曰甲子日蝕北
夷欲殺中臣有謀不者大水在東方 春秋潛潭巴曰
乙丑日蝕大旱大夫執綱 京房曰乙丑日蝕諸侯之

臣欲弑其君在西北兵行不勝後有小兵五穀頗蟲傷
春秋潛潭巴曰丙寅日蝕蟲久旱多水徵 京氏曰

丙寅日蝕司徒欲弑君後有小旱在東南 春秋潛潭

巴曰丁卯日蝕早有兵 京房曰丁卯日蝕諸侯欲弑

君在北方後有蝗蟲之殃 春秋潛潭巴曰戊辰日蝕

地動陰強 京房曰戊辰日蝕同姓近臣欲殺君後有

地動變在東南 春秋潛潭巴曰己巳日蝕地動火災

數降 京房曰己巳日蝕婚家欲弑君後有諸侯謀兵

在西南 春秋潛潭巴曰庚午日蝕後火燒後宮有兵
行 京房曰庚午日蝕司徒欲弑其主兵必行後有大
早在南方 春秋潛潭巴曰辛未日蝕大水湯湯 京
氏曰辛未日蝕司空欲弑君後有大蟲在東方 春秋
潛潭巴曰壬申日蝕水盛陽潰陰欲朔 京氏曰壬申
日蝕諸侯相弑在東北方後有小兵寇盜並行 春秋
潛潭巴曰癸酉日蝕連陰不解淫雨數出有兵 京房
曰癸酉日蝕上強天下謀兵不出其年大兵行始于西

方 春秋潛潭巴曰甲戌日蝕草木不滋王令不行

京房曰甲戌日蝕近臣欲弒君反為戮辱後有小旱在

西南 春秋潛潭巴曰乙亥日蝕陽不明冬無冰 京

房曰乙亥日蝕子欲弒父身獲虜後有陰雨一曰日蝕

陰天下大亂 春秋潛潭巴曰丙子日蝕五月大霜

京房曰丙子日蝕諸侯欲相弒兵必行在東後有大水

春秋潛潭巴曰丁丑日蝕誅三公 京氏曰丁丑日

蝕諸侯近臣欲弒其君在西北方後有小兵 春秋潛

潭巴曰戊寅日蝕天下大風無園菓 京氏曰戊寅日
蝕異姓近臣欲弑其君後歲旱土沸騰 春秋潛潭巴
曰己卯日蝕地賊起砂石踊以有壅 京氏曰己卯日
蝕東夷欲殺後有大蟲 春秋潛潭巴曰庚辰日蝕彗
星東出有寇兵 京氏曰庚辰日蝕君易賢以剛卒以
自傷後有水在東北 春秋潛潭巴曰辛巳日蝕妃謀
王子用兵 京房曰辛巳日蝕諸侯外親欲弑其君兵
行暴至期衝兵起西北 春秋潛潭巴曰壬午日蝕父

雨旬望 京氏曰壬午日蝕三公與諸侯相賊弱其君
王天應而蝕三公失國後旱且水 春秋潛潭巴曰癸
未日蝕仁義不明 京氏曰癸未日蝕諸侯上侵下臣
欲弑其君在東北後有小蟲 春秋潛潭巴曰甲申日
日蝕蟲四月大霜 京房曰甲申日蝕司馬大夫欲弑
君後有小水在晉 春秋潛潭巴曰乙酉日蝕仁義不
明賢人消 京氏曰乙酉日蝕君弱臣強司馬將兵反
征其主 春秋潛潭巴曰丙戌日蝕臣憎主獄不理多

冤訟 京氏曰丙戌日蝕同姓近臣欲弑其君後有大旱火從天墮 春秋潛潭巴曰丁亥日蝕匿謀滿王室 京氏曰丁亥日蝕君臣無別司馬牧民司徒將兵後有蟲在西北方 春秋潛潭巴曰戊子日蝕宮室內淫必惑雄 京房曰戊子日蝕妻欲害夫九族夷滅後有大水在東方 春秋潛潭巴曰巳丑日蝕臣伐其主天下皆亡 京房曰巳丑日蝕婚家欲弑後有小兵在西方 春秋潛潭巴曰庚寅日蝕誅相大水多死傷

京房曰庚寅日蝕臣欲將兵誅過賊身被刑殺後有小
早在東南方 春秋潛潭巴曰辛卯日蝕臣伐其主
京氏曰辛卯日蝕天子微弱諸侯誅兵欲弑其主卒反
得其殃後有小蟲在東方 春秋潛潭巴曰壬辰日蝕
河決海溢久霜連陰 京氏曰壬辰日蝕諸侯欲弑其
君當誅日復蝕之後有大水在東方 春秋潛潭巴曰
癸巳日蝕在陽位者權不行 京氏曰癸巳日蝕諸侯
隔絕轉相伐兵稍出 春秋潛潭巴曰甲午日蝕大蟲

螟蝗興主貪暴民流亡 京房曰甲午日蝕南夷欲弑

其君後有大旱 春秋潛潭巴曰乙未日蝕天下多邪

氣鬱鬱蒼蒼 京氏曰乙未日蝕君責衆庶暴虐黎民

背叛後有地動 春秋潛潭巴曰丙申日蝕諸侯相攻

京氏曰丙申日蝕君暴死臣下橫恣上下相賊後有

大水 春秋潛潭巴曰丁酉日蝕侯侵王 京房曰丁

酉日蝕諸侯之臣欲弑其主身反獲傷後有大兵起西

北 春秋潛潭巴曰戊戌日蝕有殃主后死天下諒陰

京氏曰戊戌日蝕婚家欲弑後有旱馬驂運 春

秋潛潭巴曰巳亥日蝕小人用事 京氏曰巳亥日蝕

主弱小人持政慾心成天應日蝕誠使精 春秋潛潭

巴曰庚子日蝕君疑其男 京氏曰庚子日蝕庶子欲

弑嫡卒不得守臣征伐後有大水 春秋潛潭巴曰辛

丑日蝕主疑三公 京氏曰辛丑日蝕賢者離散小人

盛常欲弑主 春秋潛潭巴曰壬寅日蝕天下苦兵大

臣橫 京房曰壬寅日蝕諸侯欲弑主反亡其國在東

南後有小旱在東南 春秋潛潭巴曰癸卯日蝕羣鳥
翔禽入國外伐內主危亡 京氏曰癸卯日蝕諸侯非
其天子不順司徒亡國後有大蟲 春秋潛潭巴曰甲
辰日蝕四騎脅 京房曰甲辰日蝕王后爵命絕後有
水 春秋潛潭巴曰乙巳日蝕東國發兵 京氏曰乙
巳日蝕諸侯上侵以自益近臣盜竊以為積天子不知
日為之蝕 春秋潛潭巴曰丙午日蝕者民多流亡
京房曰丙午日蝕親戚爭嗣同姓欲弑其主後有大旱

在南方 春秋潛潭巴曰丁未日蝕王者崩 京氏曰

丁未日蝕執政欲弑司徒不肖後有蟲地震動 春秋

潛潭巴曰戊申日蝕地動搖宮外侵兵強 京房曰戊

申日蝕臣欲弑君意在王位後必有小水 春秋潛潭

巴曰巳酉日蝕妃死子不葬以內亂相怨疑 京房曰

巳酉日蝕西夷欲弑君後有大兵必西行 春秋潛潭

巴曰庚戌日蝕臣相侵 京氏曰庚戌日蝕司馬之卿

欲殺有小旱 春秋潛潭巴曰辛亥日蝕子為雄 京

房曰辛亥日蝕司馬之大夫欲弑君反受其殃後有蟲
害 春秋潛潭巴曰壬子日蝕女謀王 京氏曰壬子
日蝕諸侯同姓任政者欲弑其君大夫害 春秋潛潭
巴曰癸丑日蝕水湯湯 京氏曰癸丑日蝕寇盜行兵
恐君王目為不明 春秋潛潭巴曰甲寅日蝕雷擊殺
人骨肉爭功 京氏曰甲寅日蝕同姓大臣欲弑其君
後有旱 春秋潛潭巴曰乙卯日蝕雷不行霜不行殺
草長人入宮 京氏曰乙卯日蝕必有專政欲殺不出

三年身被其誅後有大蟲 春秋潛潭巴曰丙辰日蝕

山水淫淫 京氏曰丙辰日蝕帝命之極武王乃得

春秋潛潭巴曰丁巳日蝕下有聚兵 京房曰丁巳日

蝕天乃去惡依聖人後有小兵 春秋潛潭巴曰戊午

日蝕久旱穀不傷 京氏曰戊午日蝕有婚家執政賊

由妻始後有旱 春秋潛潭巴曰己未日蝕失名王

京氏曰己未日蝕臣不安居羣陰謀欲侵後地大動

春秋潛潭巴曰庚申日蝕夷狄內攘 京氏曰庚申日

蝕骨肉相賊後有水 春秋潛潭巴曰辛酉日蝕女謁

且興 京氏曰辛酉日蝕昆弟相殺更有國家後有兵
大行三年不息 春秋潛潭巴曰壬戌日蝕羣山崩

京房曰壬戌日蝕諸侯欲殺在西南 春秋潛潭巴曰
癸亥日蝕大人崩 京氏曰癸亥日蝕天下命終極聖
人更起不可救止後大雨水

日十二辰蝕四

春秋感精符曰日蝕寅卯辰未域招謀者司徒也日蝕

巳午未火域招謀者太子也日蝕申酉戌金域招謀者

司馬也日蝕亥子丑水域招謀者司空也

按端謀人卒難別故以時

粗畧其官位南方陽精也為君君城有異雖子屬也

孝經雌雄圖曰子日日蝕

者燕國王死期在五月十一月 丑日日蝕趙國王死

期在六月十二月 寅日日蝕者齊國王死期在七月

正月 卯日日蝕者魯國王死期在八月二月 辰日

日蝕者楚國王死期在九月三月

魏氏曰越王死

巳日日蝕者

宋國王死期在十月四月 午日日蝕者梁國王死期

在五月十一月 未日日蝕者沛國王死期在六月十

二月 申日日蝕者陳國王死期在七月正月 酉日

日蝕者鄭國王死期在八月二月 戌日

魏氏曰吳國王死

日蝕者韓衛王死期在九月三月 亥日日蝕者秦

魏王死期在十月四月

日在東方七宿蝕五

黃帝占曰日入角而蝕將吏有憂國門四闢其邦凶

甘氏曰日在角亢而蝕戒之在於耕田之臣 京氏曰

日蝕角中其國不安一曰貴臣有憂一曰主農之官憂
春秋感精符曰日蝕亢中其邦君有憂 石氏曰日
蝕亢中其謀在朝廷之臣有罪者 黃帝占曰日月蝕
氐中天子疾崩 石氏曰日蝕氐中卿相讒諛人君滅
無辜 甘氏曰日在氐房而蝕戒之在三公九卿大夫
且有相譖誤主上使過刑殺不辜者 甘氏曰日蝕氐
中大官惡之一曰右宮惡之王者復以赦除之 雜書
說徵示曰淫色信讒日以蝕房參 石氏曰日入房而

蝕王者有憂昏亂大臣專權必有憂病 郝萌曰日在房心而蝕公卿大夫有黜者 春秋感精符曰日在心而蝕兵喪並起 甘氏曰日在心而蝕王者臣下相疑不相信也 甘氏曰日入心而蝕政令失儀禮度失繩則為變甚一曰君臣不相信有疑惑 海中占曰日蝕心度兵喪並發王者以赦除咎 春秋感精符曰日蝕尾箕中尊后有憂 甘氏曰日在尾箕而蝕將有疾風飛車發屋折木戒之於出入

日在北方七宿蝕六

春秋感精符曰日蝕入斗將相有憂其國飢凶一曰兵
大起 甘氏曰日入斗度而蝕其國反叛兵起 甘氏
曰日在牛而蝕戒之在右夫人姪婦且有祠禮求幸于
王者 春秋感精符曰日蝕須女邦有女主憂天下女
工不為 甘氏曰日在須女而蝕戒之宮中且有使巫
祝禱祀以求貴幸者戒之在於巫祝 黃帝占曰日蝕
虛中其邦有崩喪天下改服期九十日 甘氏曰日在

虛危蝕戒之在於主市租稅及繒帛刀劍金玉之臣

如少

府是也

甘氏曰日蝕危必有兵喪大臣薨天下改服

黃帝占曰日在營室離宮而蝕出入無近妃色趣任輔成功業

春秋感精符曰日蝕營室王者自將兵天下擾動甘

氏曰日在營室東壁而蝕則陽消微男道施而不能泄

陰道壞而不能化故多有傷者敗石氏曰日在東

壁而蝕王者不從師友失忠孝故曰虧文章圖書不用

日在西方七宿蝕七

春秋感精符曰日蝕奎南邦不寧有白衣之會 石氏曰
日蝕奎魯國凶邦君不安 甘氏曰日在奎婁而蝕慎
之在主邊境廐庫之臣一曰慎在邊境得意之臣
春秋感精符曰日蝕婁則王者郊祠不時天下不和神
靈不享小臣不忠責在大臣 甘氏曰日在婁而蝕戒
之在聚斂之臣 黃帝占曰日在胃而蝕王者食大絕
或亡王委輸之臣有黜者 春秋感精符曰日蝕胃國
王奉修宗廟敬祀神靈則害消 石氏曰日蝕胃國有

憂大臣誅一日主修郊廟奉皇天其咎消 甘氏曰日

在胃而蝕戒之在主委輸之臣

如今大司農是也

春秋感精

符曰日蝕昴王宗謀國同姓自立 石氏曰日蝕昴臣

厄囹圄者解 石氏曰日蝕昴王者有疾 甘氏曰日

在昴畢而蝕戒之在衆主獄之臣有亂天子者 春秋

感精符曰日蝕畢邊王死邊軍自殺其將若軍校尉誅

遠國謀亂 石氏曰日蝕畢天下主獄之臣有當黜者

春秋感精符曰日蝕背臣殺主慎之 石氏曰日蝕

甯大將謀議 甘氏曰日在甯參伐而蝕戒之在將兵

之臣

如今諸將軍校尉執金吾是也

春秋感精符曰日蝕參大臣有

憂之臣自相戮以外勝內遠國強王者修身則日蝕不為災 甘氏曰日在參伐而蝕戒之在將帥之臣

日在南方七宿蝕八

甘氏曰日蝕東井秦邦不臣蝕不盡謀不成天下大旱民流千里 甘氏曰日在東井與鬼蝕戒之在供養之

臣 陳卓曰日蝕東井其國內亂苛法

盛德象說曰晉咸和二年五月

甲申朔日有蝕之在東井女主之象明年皇太后以憂逼崩

春秋感精符曰日蝕

輿鬼其國君不寧臣下易服一曰秦君當之一曰皇后貴臣 甘氏曰日蝕輿鬼其國君不安近期一年遠期

三年 春秋感精符曰日蝕柳王者以疾不安宮室

石氏曰日蝕柳君厨官憂 甘氏曰日在柳七星而蝕

戒之在門戶道橋之臣

若今衛尉是也

春秋感精符曰日蝕

柳七星虧正陽王者不賜衣裳承天郊退太常放在獄則無咎 石氏曰日蝕柳七星橋門之臣有黜者 春

秋感精符曰日蝕張王者失禮宗廟不親急退太常以

廷尉代之不者不安期在十二月與五月 甘氏曰日

在注張而蝕戒之在王山澤汙池之臣

如今水衡也

黃帝占

曰日蝕翼王者退太常以法官代之有德則日蝕不為

害其歲旱 石氏曰日蝕翼者王者失禮宗廟不親

甘氏曰日蝕翼者忠臣見譖言正者亡不出其年 甘

氏曰日在翼軫而蝕戒之在王車駕之臣

如今太僕奉車駟馬是也

河圖聖洽符曰日蝕軫國有喪以赦除其咎 甘氏

曰日蝕軫貴臣亡一曰后不安期百八十日海中占
曰日蝕軫王侯壽絕王者以赦除咎則安一曰其國有
憂必有喪事

救日蝕九

春秋感精符曰救日蝕天子南面秉圖書察九野萌生
者絕始正本紫類勅下聞異郡官修政招賢進士獨絕
其萌所以防塞之者故曰蝕大水則鼓用牲于社言社
者陰之主朱絲縈社鳴鼓脅之也

按左氏傳曰莊公二
十五年六月辛未朔

日有食之鼓用牲于社非常也惟正月之朔日有食之于是乎用幣于社伐鼓于朝秋大水鼓用牲于門亦非常也凡天灾有幣無牲文公十五年六月辛丑朔日有蝕之天子不舉伐鼓于社諸侯用幣于社伐鼓于朝以昭事神訓民事君示有等威古之道也

春秋感精符曰消變之道案明壇

南郊日之將蝕漸青黑謹遣大將三公如變所感之過以告天曰天子臣某謹承皇戒退避正居思行僇謬陽精有幣已政類素正事去非釋苛禁不敢直命遣臣欽喻已絕國害之譴近以緒盡力宣文思維表道願得修政以奉宗祖追往翼今勉開嘉紀縱大揚精以興日寶

歸報天子三日就宮遣使詔諸侯問過舉名士察奸理
寬督教化不宣者審以勅身務佐為行天子吉 春秋

感精符曰朔日蝕正臣陰退后妃以內過省已蝕二日

者王侯蕃黜州輔以暴恣自改晦日蝕者正近臣退素

食 周禮地官司徒曰救日蝕則詔王鼓

鄭玄曰救日月食王必親

擊鼓

禮記昏義曰男教不修陽事不得謫見于天日為

之蝕是故日蝕則天子素服修六官之職蕩天下陽事

鄭玄曰謫之言責也

穀梁傳曰日有食之鼓用牲于社鼓禮也

用牲非禮也天子救日蝕置五麾陳五兵五鼓諸侯置

三麾陳三兵三鼓大夫擊門士擊杵

言救日降殺多少之禮也門取開閤

有陰陽之道杵舂染盛之具亦有上下陰陽之道也

星傳曰日者德月者刑日

蝕修德月蝕修刑 洪範天文曰凡日蝕改行修德即

災消除不改應在三年三年不改至六年六年不改至

九年九年而災成 司馬彪五行志曰君道有虧為陰

所乘故日蝕者陽不克也人君改修德其事則咎害除

京氏對災異曰人君驕溢專明為陰所侵則有日蝕

之災不救之必有篡臣之萌其救也君懷謙虛下賢受
諫位有德祿有智日蝕災消也 京氏曰日蝕既下謀
上救也設七事正圖書修經術改惡為化已隨賢則國
家安社稷寧 董仲舒災異對曰日蝕者陰氣盛瀆漸
奪君明治道有失臣專君政出入為奸則治道在上德
不宣下民常怨當應析寵臣之勢減玉食之權無忽諫
言大惡在於任賢則災害不生也 董仲舒曰日蝕者
邪臣蔽主之治不有反臣必有亡國退臣絕陰止權平

衡以德消則無害

荊州占曰日蝕審所始蝕之鄉及

星之野以名之當者之國吉凶在焉是故聖主見變則改
身修行親賢問老與共憂之則患可止而福可致故曰
有福將來受之以危則福為禍將受之以德則禍反為
福輒禳祠之去禍致福也 虞贊決疑曰凡救日蝕者

皆着幘以助陽日將蝕天子素服避正殿內外嚴警太
史靈臺伺日有變便伐鼓聞鼓音侍臣皆赤幘帶劍則
災異消



唐開元占經卷十

欽定四庫全書

子部

唐開元占經卷十一至
三

詳校官中書_臣李采

靈臺郎_臣倪廷梅覆勘

總校官編修_臣王熙緒

校對官庶吉士_臣潘曾起

謄錄監生_臣任鑑

欽定四庫全書

唐開元占經卷十一

瞿曇悉達 撰

月占一

月名體一

皇甫謐年歷曰月者羣陰之宗光內影月以宵耀名曰

夜光

易說卦曰坎為月

河圖帝覽嬉曰月者金之

精春秋感精符曰月者陰之精地之理廣雅曰夜光

謂之月 天官書曰太陰之精上為月月者天地之陰
金之精也 王子年拾遺記曰瀛洲水精為月 禮記
曰月者闕也 范子計然曰月者水也 淮南子曰月
者天之使也水氣之精者為月 漢書李尋上疏曰月
者衆陰之長妃后大臣諸侯之象 張衡靈憲曰月者
陰精之宗積而成象兔蛤焉陰之類數偶也羿請不死
之藥於西王母姮娥竊之以奔月遂托身於月是謂蟾
蜍 春秋演孔圖曰蟾蜍月精也 楊泉物理論曰月

陰之精其形也圓其質也清稟日之光而見其體日不照則謂之魄故月望之日日月相望人居間盡睹其明故形圓也二弦之日日照其側人觀其旁故半照半魄也晦朔之日日照其表人在其裏故不見也

月行度二

四十分日之七百四十三奇一則遲疾之一終而復始矣月朔而晨見東方謂之側匿行遲也月晦而夕見西方謂之朏行疾也遲疾相通謂之平行一日十三度六

十七分度之二十五半二十七日一千三百四十分度
之七百四十三奇一而周天矣一年月十三周天有閏
之年則十四周天與日合度是為月朔日月相與東行
日行遲而月行疾二十九日一千三百四十分日之七
百一十一則月周天復還及日即二朔去之日數也

春秋元命包曰日月右行周天二十三萬里 河圖曰
日月五星同道過牽牛女虛危室壁奎婁胃昂皆行其
南去之九尺畢北七尺觜參北一丈三尺貫井出鬼南

六尺出柳北六尺出七星張北一丈三尺出翼軫北一丈三尺貫角亢出氐南二尺出房左右服間出心北二尺尾北十尺出箕北六尺貫斗至牛此日月五星行常道也 洛書曰日月五星行歷左角內行左亢外四尺歷左右氐外行房兩服間行心內六尺行尾內十八尺行箕內十二尺行斗柄中一尺行牛中行女外四尺行虛外六尺行危外十三尺行室外十六尺行壁外十三尺行奎外十三尺行婁外九尺行胃外十一尺行昂外五

尺歷畢左角行觜內六尺行參內十八尺行井中行鬼
外十四尺行柳內九尺行七星內十五尺行張內十八
尺行翼內十六尺行軫內十三尺在上者為北此日月
五星之正道也

月行盈縮三

石氏曰明王在上月行依道若主不明臣執勢則月行
失道大臣用事背公向私兵刑失道則月行乍南乍北
女主外戚擅權則或進退眊眊皆君臣刑德不正之咎

也有不如常隨事占其吉凶月行疾則君刑緩行遲則
君刑急月之與日遲疾勢殊而事勢異也是故人君月
有變則省刑以德恩從肆赦故春秋有眚災肆赦 劉
向洪範傳曰晦而月見西方謂之朏朔而月見東方謂
之側匿朏則王侯其舒言政緩則陽行遲陰行疾也側
匿則王侯其肅言政急則陽行疾陰行遲也舒者臣驕
而執政也肅者臣下恐懼太甚也 劉歆曰舒者王侯展意專政
臣下促急故月行疾也肅者王侯縮訥不任事臣下弛縱故行遲

也春秋運斗樞曰主勢集於后族羣妃之黨橫僭為害則月盈
京房易飛候曰月生八日當中五日六日而中有兵在列大戰
荊州占曰月行疾天下有急事又曰月行過急奸邪起月行
不及度多留事又曰八月五日昏而月中急兵大起糴大貴

又曰大月八日昏中小月七日昏中過度有兵事不及度有喪事
月行陰陽四

京氏對灾異曰人君好用佞邪朝無忠臣則月失其行
班固天文志曰月失節度而妄行出陽道則旱風出

陰道則陰雨 京房妖占曰月行南為旱行北為水當
道天門駟之間天下大安五穀大得人主延年益壽
河圖帝覽嬉曰月行一歲不三出昴畢間來年有兵
郝萌曰月不道東西咸必有賊 京房易飛侯曰月入
八日北向陰國亡地月不盡八日北向陽國亡地

月光明五

易萌氣樞曰臣道修則月明有光 高宗占曰月出如
盛天下且有主治也 尚書緯考靈曜曰五政不失日

月光明五政謂四時及夏季之政也 禮緯含文嘉曰
君道尊而制命即日月精明 黃帝占曰有道之國日
月過之即明人君吉昌人民安樂 孫氏瑞應圖曰人
君不假臣下以權則日月揚光 甘氏曰月經心清明
烈照天王內明必有延慶

月變色六

河圖帝覽嬉曰月光如張炬火所宿其國立王亦立上
卿 京氏妖占曰月變色青為飢與疫赤為爭與兵黃

為德與喜白為旱與喪黑為水民半死 京房占曰君

幼弱月青色 京房易飛候曰月生八日當玄兔色上

旬糴貴無則上旬糴賤不盡八日色下旬糴貴無則豐

而下旬賤 荊州占曰月赤如赭大將死於野又曰月

赤如血有死王以宿占國 荊州占曰月生而色黃王

人受其殃月二十八日其色黃攻地入客受殃 河

圖帝覽嬉曰月入而黃主人受殃出而黃赤客受其謫

赤三日不復主人戰不勝 河圖帝覽嬉曰月生三日

其中縵縵如絲布狀其野虛兵在內盡出在外主人不勝

月光盛七

郝萌占曰月初生盛女主持政 京氏易飛候曰月之光如張芒所宿之國立君三齊所宿之國立將軍上卿 荊州占曰月上弦已後盛君無戕德臣執權柄人背君尊其臣

月無光八

太公陰秘曰君不明臣不忠故月無光月不明見變變不救殃禍生臣欲反主失名其救也安百姓用賢人弱者扶無則害 黃帝占用兵要訣曰沉陰日月俱無光晝不見日夜不見月星皆有雲障之而不雨此為君臣俱有陰謀兩敵相當陰相圖議也若晝陰夜月出君謀臣夜陰晝日出臣謀君下逆上也 甘氏曰人君宰相不從四時行令刑罰不時大臣奸謀離賢蔽能即日月無光見瑕謫不救其國五穀不成六畜不生人民上下

不從盜賊並起 河圖帝覽嬉曰日月無光有亡國死

王期不出五年 孝經內記圖曰主驕慢日月失明

京氏占曰月大無光國無王民不安天下有兵 京氏

占曰月昏無光則淵涸山崩王者惡之 河圖帝覽嬉

曰月大無光主死士戰不勝 高宗占曰月大無光城

不降月小無光城降 京氏妖占曰月無光臣下作亂

教令不行民飢國亡 京氏易飛候曰月不光貴人死

荊州占曰月生無光下有死王 京房易飛候曰月

生無光君子徒凶

月兔不見九

河圖帝覽嬉曰月中無兔蟾蜍天下無官 荊州占曰
月中兔蟾蜍不見天下失女主一曰宮女不安 河圖
曰蟾蜍去月天下大亂 黃帝占曰月望而月中蟾蜍
不見者月所宿之國山崩大水城陷民流亡亦為失主
宮中必不安

月中有離雲氣十

荊州占曰有雲如杆長七尺衝月所宿國主君將死

京房易飛侯曰白雲如杆長七尺衝月所宿之國人主

死杵柄中月王后死八月中王后當之月戴珥主人來

疾 河圖帝覽嬉曰月始出時有雲居其中如禽獸狀

其名曰綦婁甲乙見東方受之丙丁見南方受之戊己

見中央受之庚辛見西方受之壬癸見北方受之受者

受其害 荊州占曰月下有氣如人相隨者是謂惡成

侯王有坐之者有分國 荊州占曰月中有雲如人行

者臣害主兩主爭客勝有三人天維絕主人必更河
圖帝覽嬉曰月旁有白雲大如杵者三抵月期六十日
外有戰破軍死將 荊州占曰月始出有黑雲貫月名
曰激雲不出三日異雨有害人者客且至 河圖帝覽
嬉曰月旁多赤雲如人頭大戰多白為風黑為雨 荊
州占曰有赤雲黑雲交臨月當其國亡軍 河圖帝覽
嬉曰月旁有白雲一黑雲二蒼雲一其大如厚布抵貫
月圍城拔邑 高宗占曰青雲挾月是謂賊害王受其

殃歲為五穀不熟赤雲挾月是謂仇賊黃雲挾月女主
有戮死者期不出三十日白雲挾月其國君遇賊黑雲
挾月陰雨踰時 荊州占曰月中有黑氣大如桃若李
臣有蔽主明者 京氏易傳曰有黑雲狀如羣羊豕如
飛鳥如鳴雞在月及月旁三日五日不雨匈奴兵起
京房易傳曰赤氣覆月如血光大旱人民飢千里 荊
州占曰常以十四日夜候月中有氣如飛鳥其野無居
者 尚書金縢曰視不明聽不聰則雲氣五色蔽日月

之明無救則羣臣謀殺關梁不通其救關四門求仁賢
春秋感精符曰諸氣之出皆歷日月旁天子國君之
害也期如日蝕遠近之符 荊州占曰凡諸氣日月有
變不出兩日大雨吉不雨皆凶小雨無益

月生牙齒爪足十一

河圖曰月生齒主見欺

闕

春秋文曜鉤曰趙有君尹吏日月生齒在畢宿主見欺
大星占曰子殺父臣刺君期歲二月有兵患

宋均注曰
月太陰之

精也屬水水生子金畢金精也水齒之臣子殺逆之象也畢又為邊兵畢主八月其冲則二月兵患於此發也

荊州占曰月生齒人主有賊臣王者偏左右

闕

徐廣歷記曰隆安五年三月甲子月生齒在斗占曰月

生齒人主有賊臣羣下相賊

闕

春秋感精符曰月

生齒妻妾黜外垂牙主威歇考異郵曰諸侯謀叛則

月生爪牙荊州占曰月生爪牙國君遇賊又曰月爪

所指四方煩苦有土功事洛書曰陪臣執命王公望

風其將叛謀公卿羣下並附諸侯歸心則月舉足垂牙

河圖秘徵曰帝淫佚政不平則月生足 春秋緯曰

生足君有過后族擅權月生足甚有此類則亡國也

荊州占曰月生牙齒天子有賊臣羣下自殘害 郝萌

曰月生爪牙主賞罰不行偏任兵起招賢明奪強國兵
勢則已 海中占曰月生爪牙人主偏左右遇賊有刺

客各在中分

月生角芒刺十二

春秋運斗樞曰后族擅權月生芒 洛書摘芒辟日月

盈而生芒后黨成輩且害其主 春秋運斗樞曰月垂
芒國亂憂在公禍大作兵敗北 夏氏曰月上有黃芒
君福昌一曰皇后有喜 荊州占曰月生角天下兵國
將受殃 河圖帝覽嬉曰月生四日月兩角刺如矛狀
其野有弑其君者且廢之其上角大者君上勝其下角
大者臣下勝 荊州占曰月生刺在一日是謂賊賊生中
國月二日生刺是謂隱其女子卒有陰疾月三日生刺
是謂內傷大陽是謂天芒月四日生刺是謂不明是謂

蔽光月五日生刺是謂音蕩當有訛言者月六日生刺
是謂內虛是謂去邑月七日生刺是謂有剝其地弱月
八日生刺是謂割地有分民其當者名曰禽獲陽平月
九日生刺其地民飢民以食弱其世以兵行月十日生
刺陰始盛主女子執朝政月十一日生刺是謂憂土居
老幼穴處月十二日生刺其地有以陰死者月十三日
生刺是謂始強得地月十四日生刺是謂不利其女君
傷下月十五日生刺是謂盛強其強地多兵月十六日

生刺是謂內弱大臣弑其主月十七日生刺是謂威法
主有流兵月十八日生刺是謂君瘟死月十九日生刺
是謂陽衰陰治女子執事月二十日生刺是謂地有土
功月二十一日生刺是謂千里外聚其都有土功月二
十二日生刺是謂始衰貴人多死者月二十三日生刺
是謂陰盛女子為王月二十四日生刺是謂中有大謀
月二十五日生刺是謂隱蔽是謂佚殃月二十六日生
刺是謂感多憂在內謀月二十七日生刺是謂大飢月

二十八日生刺是謂竟城數政月二十九日生刺是謂
內亂是謂自伐

月大小十三

荊州占曰月初生小而形廣大者月有水災 海中占
曰月大而體小者早有氣色非常皆為皇后陰謀事

月分毀及墜下流十四

京氏易妖占曰月毀為三四五六見天下亂 荊州占
曰月分為兩國無道君失天下 河圖占曰地淪月散

必有立王 京氏易妖占曰月自天墜有道之臣亡

京房易妖占曰月出地中庶民為王公

月晝見十五

易緯辨終篇曰月晝見隱謀合國雄逃 京房曰月晝

見必有亡國 京氏對災異曰月晝明奸邪並作專明

擅君之朝 京房對災異曰月若晝明者月為臣日為

君臣以明續君黨當在其時不可與君用力含穢以舒

刑今晝明者奸邪並作專明擅君之朝不救則失其行

而毀矣其救也出退強臣斷奸佞近直臣親賢良則月
得其行不可專明矣 洛書曰月與大星並出晝見是
謂爭明大國弱小國強有立侯王者

月當盈不盈十六

石氏曰月當盈不盈君侵臣不則有旱災

月當朔而不朔晦不盡十七

荊州占曰月當朔而不朔國有大喪月當晦而不盡所
宿國亡地

月當弦不弦不當弦而弦十八

荊州占曰月生六日而弦大臣為政不用主命 荊州

占曰月生七日而弦主人勝客不勝主人將死 荊州

占曰月未當弦而弦是謂兵起當弦不弦國有大兵

郝萌占曰不當上弦而弦國兵起 荊州占曰未當

下弦而弦臣下多奸 荊州占曰月生八日而弦天下

大安八日而不弦攻人城者不勝 河圖帝覽嬉日月

十日不弦以戰不勝主將死當弦弦也是謂大安

月當望不望未當望而望十九

荊州占曰月十四日而望主更令期一年十五日而望
主安久長天下和人民歌樂以行 河圖帝覽嬉日月

未當望而望是謂趣兵以攻人城者大昌當望不望以
攻人城者有殃所宿之國亡地 荊州占曰月十六日

而望主不昌更立公王期十年

此謂不依歷數
而望他皆徵此

易萌

氣樞曰月當滿不滿君侵臣當毀不毀臣陵君君侵臣
則大旱之災臣陵君則有兵水之難大進月盈則有人

君之憂縮則有臣下之害 郝萌占曰月行急未當中而中未當望而望皆為急兵大戰軍破將死大臣執政逼君女主將有擅權天下亂易宗廟

月當毀不毀未當缺而缺二十

春秋漢合孳曰妻怨成無詘制之者則月滿不虧有女

妃虐

宋均曰不虧不缺也虐若趙飛燕妒殺皇子

荊州占曰月當毀不毀

陰事無形 黃帝占曰月未當缺而缺大臣滅女主黜

諸侯世家絕

月當出不出出而復沒二十一

京房占曰月當出而不出有陰謀有死王天下亂 郝
萌占曰月生七日見者天下有兵十日見者有大兵十
二日至十六日而後見者天下有滅國 海中占曰月
出復沒天下亂

月再中反缺二十二

京氏曰月再中帝王窮 荊州占曰月望前西缺望後
東缺名曰反月臣下不奉法制度侵奪主勢無救為涌

水兵起其衝其救也正刑罰誅奸猾任賢而稽疑定謀事成即月變為復矣

月失行及偃仰二十三

郝萌占曰月出非其所行非其路皆女主失行奸通內
外陰國兵強中國人飢下欲僭權 海中占曰月生正
偃天下有兵合無兵主人凶 京房易飛侯曰正月有
偃月必有喜

月出異方二十四

黃帝曰月始生見南方而蝕者糴大貴 荊州占日月
始生天中者上謀下其事不成

月並出及重累二十五

京房易傳曰君弱而婦強為陰所乘則月並出 京氏
曰月並出為并明天下有兩王立又云相去二寸臣作
亂滅其主 春秋運斗樞曰主勢奪於后族羣妃之黨
橫僭為害則月盈並若兩月連出妃黨交萌若炤同力
排滅王公 郝萌曰月並出相重當有急兵至 荊州

占曰三月並見其分有立諸侯而亡女主有競兩月並出天下治兵異姓大臣爭朝勢為害王者選能授之月重出皆為異兵殘害為天下亂首將有亡天下之象

案漢成帝

建始元年八月戊午晨漏未盡二刻兩月重見京氏易傳曰君弱婦強為陰所乘則兩月並見其後趙飛燕為皇后姊姊專寵殺害皇子成帝不能禁後皆誅滅之應也又按故太史令李淳風云隋大業九年正月二十七日曉起東方有二月見相去二尺許在箕斗之間眾俱見之俄而楊玄感于黎陽起逆朱甓管宗義殘賊江

南天下因此遂兵賊相繼至于滅亡此尤效

海中占曰月兩弦中間月光

盛而衆多或二三或四五及至十月並見皆為天下分

裂天子失政政在諸侯自立

諸月傍氣象皆與日占大同

春秋潛

潭巴曰十月並出不必爭強猾出

宋均曰月為大臣今如是大臣必多爭並

為奸稱疾也

郝萌占曰東方小月承大月小國毀大月承

小月大國伐之為主客在西方小月承大月小邑勝大

月承小月大邑勝 春秋運斗樞曰小月承大月羣姦

在宮當此之時主若贅旒

宋均注曰喻見制在下也

大月承小月近

臣起讒人橫陪臣執命三公望風

宋均曰望風者望陪臣風而事之也

唐開元占經卷十一